

#RSABUDGET2025

Ushicilelo oluhlanganyelwe phakathi koMgcinimafa KaZwelonke kanye Nophiko Oluqoqa Intelu LwaseNingizimu Afrika  #RSA Budget |  #RSABudget2025

ULWAZI

SIYINI
ISABELOMALI?SIHLANGANISWA
KANJANI
ISABELOMALI?

Ngaphambi kokuqala konyakamali ngamunye, uNgqongqoshe WezeziMali wethula isabelomali sikazwelonke, lapho ememezela khona ukusetshenziswa kwezimali kukahulumeni, intela kanye nezinhlelo zokuboleka zeminyaka emithathu ezayo. Isabelomali sikazwelonke sicaza imali phakathi kweminyango kazwelonke, izifundazwe kanye nomasipala.

1. Kuschicilelwa imihlahlandlela okumele iminyango kahulumeni iyilandele ekudidiyelweni iSabelomali
2. Iminyango kahulumeni ibeka uhlu lwezidingo zayo ngokubaluleka kwazo bese ididiyela izinhlelo zokusetshenziswa kwemali nezethembiso zokulethwa kwezinsiza zomphakathi
3. Iziphakamiso zeSabelomali zihanjiswa kuMgcinimafa Kazwelonke bese ziyadingidwa
4. Iziphakamiso zokwabiwa kwemali zicutshungulwa amakomidi abaQondisi-Jikelele beminyango kahulumeni ehlukahlukene
5. Izincomo zeSabelomali zenziwa eKomidini loNgqongqoshe
6. Isitatimende Senqubomgomo Yesabelomali Sesikhathi Esimaphakathi sinikeza izinkomba ngokuzokwenzeka kwiSabelomali esizayo
7. Kuthathwa isinqumo sokugcina kuKhabhinethi ngemali ezokwabiwa
8. Kulungiswa imibhalo yeSabelomali
9. Kwethulwa iSabelomali Esiyinhloko
10. IPhalamende lidingida futhi lamukele iSabelomali
11. Isabelomali sithunyelwa kuMengameli ukuze asicikice sibe ngumthetho



UKUPHENDLA INDLELA EPHOKOPHELE EKUKHULENI KOMNOTHO OKUBANDAKANYAYO KANYE NOZINZO KWEZOMNOTHO

MNU. ENOCH GODONGWANA
UNGQONGQOSHE WEZEZIMALI

Ukuze ikwazi ukubhekana nez-inselelo zayo ezinkulu ezikhahlameza abantu emphakathini futhi ukuze kwenziwe ngcono iz- inga lempilo ephilwa ngabantu ezweni, iNingizimu Afrika idinga ukukhula komnotho ngesivini futhi kwakhiwe namathuba omsebenzi angeziwe. Lokhu-ke kudinga ukuthi kuqinisekiswa uzinzo kumananintengo nasezimalini zikahulumeni, ugesi owengeziwe kanye nokuhamba ngokushesha kwempahla, izinsizakalo zikahulumeni ezitholakala ngaso sonke isikhathi ngendlela ethembakele kanye nokukhushulwa kotshalomali olufakwa emiklamweni yengqalasizinda.

Isabelomali sowezi-2025 senza utshalomali olunobuqhinga ukuze kufezekiswe ukukhula komnotho

okusheshayo, ngokuthi kugxilwe emiklamweni yengqalasizinda kagesi, ujangtshi nezitimela, amanzi kanye nezokuthutha. Nakuba umnotho ungakhulanga ngesivini esihle ngowezi-2024, izinkomba zibonisa ukuthi isimo sizoba ngconywa kusukela ngowezi-2025 kuya phambili. Esikhathini esimaphakathi, kubhekeke ukuthi umnotho ukhule ngephesenti eli-1.6 ngonyaka futhi ukuqaliswa ngempumelelo kwezinguquko kungaholela ekutheni liphakame izinga lokukhula komnotho. Kunenqubekela phambili ebonakalayo emkhakheni kagesi nowezokuthutha, futhi kusenjalo kunezinguquko ezintsha ezenziwayo eziqondiswe ekuletheni uzinzo nobungcono kuphakelweni kwamanzi. Kule minyaka emithathu ezayo kunemali elinganiselwa kuma-R1.03 thrilioni ezosetshenziswa emiklamweni yengqalasizinda ehlukahlukene. Uhulumeni uzoqhubeka nokweseka abantu abampofu ngokuthi abeke

eceleni isamba esikhulukazi semali ezofakwa kwezemfundo, ezempilo kanye nezokuthuthukiswa komphakathi.

Esikhathini esimaphakathi, uhulumeni uhlela ukutshala izimali ekuphuculweni kohlelo lokuthuthukiswa kwezingane zisencane (ECD) ukuze kukhuliswe isibalo sezingane ezifnyelela ohlelweni lwe-ECD olusezingeni elifanelekile. Uhulumeni uhlose futhi nokuqasha odokotela abangasebenzi asebeluphothulile uhlelo oluphoqelekile lokusebenza ezikhungweni zomphakathi.

Isibonelelomali sesikhashana sokulekelela labo abakhahlanyezwa yi-COVID-19 sizokwelulwa kuze kube nguNdasa 2026, futhi kuhlinzekwe ngesabelo sesikhashana ngowezi-2026/27 nowezi-2027/28.

Ukuncishiswa komthwalo wezikweletu kuzothi futhi ngokuhamba kwesikhathi nakho kunciphise inani lemali esetshenziswa nguhulumeni ukukhokhela izikweletu lezo.

Ngokuqhubeka kwesikhathi lokhu kuncishiswa kwenzalo ekhokhelwa izikweletu kuzolekelela uhulumeni ukuthi akwazi ukuphatha kangcono izimali zakhe, okuyinto ezolekelela ekukhuliseni umnotho. Ngenkathi incipha inzalo ekhokhelwa izikweletu, uhulumeni uzoba nemali ethe xaxa angayisebenzisa emikhakheni enjengowezemfundo, owezempilo nowezengqalasizinda.

Kusukela mhla lu-1 kuZibandlela 2024, iNingizimu Afrika iyona eqhoqhobe isihlalo sokwengamela i-G20. Ngenkathi iNingizimu Afrika iphethe lesi sikhundla sokwengamela i-G20, ezosiphatha unyaka owodwa, izogxila ekugququzeleni ukukhula komnotho okubandakanyayo futhi okusimeme, futhi ilwisane nobubha. Ukuphatha lesi sikhundla sokwengamela i-G20 kulindeleke ukuthi kukhuthaze imisebenzi yezomnotho, ikakhulukazi emikhakheni enjengowezokuvakasha nowokunakekelwa kwabavakashi.



Esikhathini esimaphakathi, koku-bili utshalomali oluvela kuhulu-meni kanye notshalomali oluvela emkhakheni ozimele kuzokhu-phuka njengephesenti le-GDP, okuqopha igxathu eliya phambili emizamweni yezwe yokukhuthaza ukukhula komnotho.

Kodwa-ke yize kunjalo, kudingeka ukukhula komnotho ngesivini esisheshayo ukuze kubhekwane nezinsalelo ezilokhu zibelesele njalo zokukhula komnotho ngonyawo lonwabu, izinga eliphakeme lokuntuleka kwemisebenzi kanye nobubha.

Uhulumeni uqalisa izinguquko zokukhulisa utshalomali olufakwa

kwingqalasizinda kanye nokukhuthaza ukubamba iqhaza komkhakha ozimele. Lezi zinguquko zibandakanya ukwenza kube lula ukuthi inkampani ezimele ikwazi ukubambisana nesikhungo sikahulumeni ekuhlinzekweni kwemiklamo, nokwenza ngcono indlela uhulumeni ahlelela ngayo ingqalasizinda futhi kuthuthukiswe nokuziphendulela kweminyango kahulumeni nezikhungo zombuso ngemisebenzi yazo. Uma sezisonke, izinguquko ezihlangozwayo zizothuthukisa ukuhlela, ukuxhaswa ngezimali kanye nokuqaliswa kwemiklamo yengqalasisinda, okuyinto ezoqinisekisa ukuhlinzekwa ngokushesha kwengqalasizinda esekela

“...ukuhlinzekwa kwengqalasizinda ngokushesha kuzokhuthaza ukukhula komnotho, futhi kudale namathuba omsebenzi”

ukukhula komnotho, enweba ukufinyelela kwizidingongqangi futhi idale amathuba omsebenzi.

Umkhakha kahulumeni uzochitha imali engama-R1.03 thriliyoni kwingqalasizinda esikhathini esimaphakathi. Ukutshalwa kwezimali kwingqalasizinda yezomnotho, okuzokwenziwa ikakhulukazi yizinkampani zombuso, kuzofinyelela kumaphesenti angama-81.5 esilinganisonani sochithomali lwesikhathi esimaphakathi. Lezi zimali zizosetshenziselwa ukwelula amandla okuphehlwa nokukhiqizwa kukagesi, ukuthuthukiswa nokwelulwa kohlelo lonkana lwezokuthutha futhi kuthuthukiswe nezinsizakalo zokuthuthwa kwendle nokuphakelwa kwamanzi. Ingqalasizinda yezinsiza zikahulumeni, kubandakanya ezempilo kanye nezemfundo, izofinyelela kumaphesenti ayi-15.5 ochithomali selulonke. Eminye yale miklamo izodinga utshalomali olwengeziwe oluvela kubatshalizimali abazimele, kanti futhi eminye izokwenziwa ngaphansi kobambiswano phakathi kwezinkampani ezizimele kanye nezikhungo zikahulumeni.

AMAPHUZU AVELELE ESABELOMALI SOWEZI-2025

1. Izibonelelo zokunciphisa izindleko zokuphila nokubhekelela abahlwempu – kubandakanya ukuthuthukiswa komphakathi, izinhlelo zokuqashwa, ezempilo, ezemfundo kanye nokuvikelwa komphakathi – esikhathini esimaphakathi zizofinyelela kwisilinganisonani esingamaphesenti angama-61 ochithomali olungenanzalo.
2. Izibonelelo zikahulumeni ezingunaphakade zizokwenyuswa ngezingasilinganiso elingaphezu kwelokwehla kwamandla emali ukubhekana nezindleko zokuphila eziphakeme futhi isibonelelomali sabakhahlanyezwa yi-COVID-19 sizokhubeka kuze kube ngumhla zingama-31 kuNdasa 2026.
3. Ukuthuthukiswa komnotho ngumkhakha okhula ngesivini esikhulu kakhulu njengoba kukhule ngesilinganisonani saminyaka yonke esingamaphesenti ayisi-8.2 esikhathini esimaphakathi, okuwukukhula okuqhutshwa yizabelomali eziphezulu ezifakwa kwingqalasizinda.
4. Iziphakamisongqangi zentela zibandakanya ukungakhushulwa kwemiklamontela, izaphulelontela, intelamhlomulo yosizo lokwelashwa okuye kwenzelwe ukubhekelela ukwehla kwamandla emali; inteliso yemikhizozo kawoyela nezibaleli; kanye nokukhushulwa kwentela yempahla ekhiqizwa ezweni ngezinga elingaphezu kwelokwehla kwamandla emali.
5. Ngowezi-2025/26, isikweletu sikahulumeni sizozinza kumaphesenti angama-77.4 e-GDP.
6. Kuqagulwa ukuthi ukukhula komnotho koqobo kuzokhuphuka kufinyelele ku-1.4 phesenti ngowezi-2025.
7. Esikhathini esimaphakathi kuzoxhaswa ngemali eyizigidigidi ezingama-R180 izinhlelo ezisemqoka eziyidinga kakhulu imali, kubandakanya nezabelomali zesikhashana zeminyango ehlinzeka ngezidingo ezingumongo.

BHEKA IKHASI ELILANDELAYO →

UKUKHUTHAZA UKUKHULA KOMNOTHO NGOKUGUQULA ISAKHIWO SAWO

Umnotho weNingizimu Afrika ubhekene nezinsalelo ezinjen-gokunqamuka kukagesi, uhlelo lwezokuthutha oluntekenteke kanye namazinga aphakeme obuge-bengu nenkohlakalo, osekunciphise kakhulu ukwethenjwa komnotho futhi osekdale ukwehla kwezinga lokukhiqiza.

Isigaba sokuqala somkhankaso i-Operation Vulindlela bekuhlolwe ngaso ukunciphisa ukunqamuka kwamandla kagesi, ukulungisa izinkinga ezikhona ohlelweni lwezokuthutha, ukwehlisa izindleko zedatha, ukukhuphula izinga lokuphakelwa kwamanzi, ukuheha amakhono kanye nokweseka ezokuvakasha.

Izinguquko ezizayo zizogxila ekwenzeni kube lula ukuthola umsebenzi nokuqasha abantu – ikakhulukazi ngokulungisa izinkinga zokungalingani okukhona kwezokuhlaliswa kwabantu, ngokusebenzisa amadolobha ukuqhuba imisebenzi yezomnotho kanye nokuthuthukisa ukuhlinzekwa kwezidingongqangi komasipala.

IZINHLELO ZOKUQASHWA KOMPHAKATHI ZITHOLA UKWESEKWA OKUNAMANDLA

Nakuba isibalo sabantu abasebenzayo besime ezigidini eziyi-16.8 ngekota yokuqala yowezi-2025, ukuntuleka kwemisebenzi eNingizimu Afrika kusaphakeme kakhulu njengoba kume kumaphesenti angama-32.9.

Izinhlelo zokuqashwa komphakathi (PEPs) zisemqoka kakhulu ekubhekaneni nokuntuleka kwemisebenzi okuphakeme.

Ama-PEPs azothola uxhasomali olwengeziwe olungama-R8.8 ezigidigidi ngowezi-2025/26. Izikhungo ezisemqoka ezizohlomula zibandakanya:

- **UMnyango Wezemfundo Eyisisekelo:** isamba esingama-R5.8 ezigidigidi sohlelo lwamathuba omsebenzi ezikoleni zemfundo eyisisekelo.
- **UMnyango Wezemidlalo, Ezobuciko Namasiko:** isamba esingama-R0.35 ezigidigidi




- sohlelo lokukhuthaza imboni yabaqambi namaciko.
- **UMnyango Wezohwebo, Ezezimboni Nokuncintisana:** isamba esingama-R1.3 ezigidigidi seSikhwama Sokuqashwa Komphakathi.
 - **UMgcinimafa Kazwelonke:** isamba esingama-R0.45 ezigidigidi soHlelo Lokuqashwa Emadolobheni.
 - **Uphiko Lukazwelonke Lokuthuthukiswa Kwentsha:** isamba esingama-R0.55 ezigidigidi soHlelo Lukazwelonke Lokucija Intsha Ngamakhono.
 - **UMnyango Wezokuqashwa Nezabasebenzi:** isamba esingama-R0.35 ezigidigidi sezin-hlelo ezinjengohlelo i-National Pathway

Management Network, iSikhwama Sokukhuthaza Ukuqanjwa Kwezinhlelo Nezindlela-kusebenza Ezintsha kanye nezinhlelo zokuqeqeshelwa emsebenzini.

Ngaphezu kwalokho, uMgcinimafa Kazwelonke neHhovisi likaMengameli, ngokusebenzisana nezinye izikhungo zombuso, sebeqalisile ukubuyekeza kabanzi izinhlelo zokulekelela abantu abangasebenzi ukuthi bathole umsebenzi, ama-PEPs kanye nohlelo lokweseka umphakathi ukuze kuphuculwe indlela okusebenza ngayo lokhu.


Ngale mizamo, uhulumeni uthemba ukuthi uzokwazi ukwenza amagxathu amakhu-lukazi ekunciphiseni ukuntuleka kwamathuba omsebenzi.

1 IMITHOMBO YENGENISOMALI KAHULUMENI NGOWEZI-2025/26



R 2 021.6bn	78.4%	IZINTELA
R 377.9bn	14.6%	UKUBOLEKA
R 179.7bn	7.0%	INGENISOMALI ENGENANTELA


2 UCHITHOMALI LUKAHULUMENI NGOWEZI-2025/26



R 426.3bn	16.5%	IZINDLEKO ZOKUKHOKHELA ISIKWELETU
R 420.1bn	16.3%	EZENHLALAKAHE YOMPHAKATHI
R 346.5bn	13.4%	EZEMFUNDO EYISEKELO
R 296.1bn	11.5%	EZEMPILO
R 289.8bn	11.2%	EZOKUTHUTHUKISWA KOMNOTHO
R 280.4bn	10.9%	EZOKUTHUTHUKISWA KOMPHAKATHI
R 263.2bn	10.2%	UXOLO NOKUVIKELEKA
R 146.6bn	5.7%	EZEMFUNDO EPHAKEME NOKUQEQESHA

3 IZIBONELELO ZIKAHULUMENI

	2024/25	2025/26
ISIBONELELO SABADALA	R2 185	R2 315
ISIBONELELO SOMAKADEBEBONA BEZEMPI	R2 205	R2 335
ISIBONELELO SABAKHUBAZEKILE	R2 185	R2 315
ISIBONELELO SABANAKEKELI BEZ-INGANE EZINGENABAZALI	R1 180	R1 250
ISIBONELELO SABANAKEKELI BEZINGANE EZIKHUBAZEKILE	R2 185	R2 315
ISIBONELELO SEZINGANE	R530	R560
ISIBONELELO SABANGAKWAZI UKUZINAKEKELA NGOKWABO	R530	R560



19.3 izigidi

abantu abazobe bethola izibonelelo zikahulumeni ngoNdasa 2028

Ngowezi-2025/26 iSabelomali sizokhuphula amanani ezibonelelo ezingunaphakade ngezingsilinganiso elingaphezu kwelokwehla kwamandla emali

4 ISABELOMALI SISEKELA UKUKHULA KOMNOTHO, AMATHUBA OMSEBENZI NOKUTHUTHUKISWA KOMPHAKATHI




1.4 phesenti

ukukhula koqobo kwe-GDP okulindelekile ngowezi-2025



61 phesenti

uchithomali lokuthuthukiswa komphakathi, imisebenzi, ezempilo, ezemfundo nokuvikelwa komphakathi kule minyaka emi-3 ezayo



R35.2 izigidigidi

uxhasomali olwengeziwe lokwelula isibonelelomali sabakhahlanyezwa yi-COVID-19 kuze kube uNdasa 2026



R871.3 izigidigidi

yezidingongqangi, izindlu, ezokuthutha umphakathi noguquko kwezokuhlaliswa kwabantu nokuthuthukiswa kwezindawo ezisemadolobheni esikhathini esimaphakathi



R900.5 izigidigidi

eyabelwe ezokukhiqiza, amabhizinisi amancane nezinhlelo zokuqashwa komphakathi esikhathini esimaphakathi ukukhuthaza ukukhula komnotho nokuqashwa kwabantu


5 IZINHLELO ZOKUQASHWA KOMPHAKATHI



R8.8 izigidigidi

uxhasomali olwengeziwe olwabelwe izinhlelo zokuqashwa komphakathi ngowezi-2025/26 ukweseka izindlela zokuziphilisa, ukuqhuba izinguquko esakhiweni somnotho nokuvumela ukwakhiwa kwemisebenzi.

6 IZINKOKHELO ZIKAHULUMENI EZINGENANZALO KANYE NEZINENZALO NJENGENGXENYE YESAMBA SEZINDLEKO SEZIZONKE



* Uchithomali olungenanzalo yisamba sochithomali lukahulumeni oluphelele ingafakwe inzalo ekhokhelwa isikweletu.

■ Uchithomali olungenanzalo* ■ Inkokhelo yenzalo

IZIPHAKAMISO-NTELA ZOWEZI-2025



INTELA YENGENISOMALI YOMUNTU SIQU

NGABE AKUTHINTA KANJANI AMAZINGA-NTELA ENGENISOMALI YOMUNTU SIQU?

Imiklamontela yengenisomali yomuntu siqu kanye nezaphulelontela kusalokhu kungaguqulwanga kusukela ngowezi-2023. Isamba sengenisomali engatholwa umuntu ngaphambi kokuba kudingeke ukuba akhokhe intela ngonyakamali osukela mhla lu-1 kuNdasa 2025 kuya kumhla zingama-28 kuNhlolanja 2026 sime kanje:

IMIKHAWULONTELA	UNYAKAMALI WENTELA 2025/26
Abangaphansi kweminyaka engama-65	R95 750
Abaneminyaka engama-65-74	R148 217
Abaneminyaka engama-75 nangaphezulu	R165 689

Izaphulelontela zomkhokhintela ngamunye zime kanje:


IZAPHULELONTELA	UNYAKAMALI WENTELA 2025/26
Umkhakha wokuqala (bonke abantu)	R17 235
Owesibili (abanama-65 nangaphezulu)	R9 444
Owesithathu (abanama-75 nangaphezulu)	R3 145

IZINTELA ZEMIKHIQIZO ENOBUNGOZI

UKUKHUSHULWA KWENTELA YOTSHWALA NOGWAYI

Intela eqondene ngqo notshwala izokhuphuka ngamaphesenti ayisi-6.75 bese kuthi imikhiqizo kagwayi ikhuphuke ngamaphesenti aphakathi kwamaphesenti ama-4.75 namaphesenti ayisi-6.75 kusukela mhla ziyi-12 kuNdasa 2025.

	KUZOKHUPHUKA NGAMA:
Ubhiya wemvubelo	16c ngekani elingama-340ml
Iwayini elingahluziwe	29c ngebhodlela elingama-750ml
Iyawini elihluziwe	48c ngebhodlela elingama-750ml
Iwayini elihlohlozayo	90c ngebhodlela elingama-750ml
Ama-cider neziphuzo zezithelo ezinotshwala	16c ngekani elingama-340ml
Ugologo	R5.97 ngebhodlela elingama-750ml
Usikilidi	R1.04 ngephakethe lama-20
Izinti zomkhiqizo kagwayi oshisiweyo	77c ngephakethe lama-20
Ugwayi kasikilidi	R1.16 ngama-50g
Imboza	50c ngama-25g
Izigazu	R8.49 ngama-23g
Ingxube enenikhothini nengenayo inikhothini kagwayi obhenywa ngemibhobho yobuchwepheshe besimanjemanje	14c ngemililitha



AMAZINGASILINGANISO ENTELA

INTELA YENGENISOMALI: YOMUNTU NGAMUNYE

Intela okumele ikhokhwe ngumuntu ngamunye ngonyakamali wentela ophela phakathi kwamhlalu-1 kuNdasa 2025 nomhla zingama-28 kuNhlolanja 2026

Ingenisomali Ekhokhelwa Intela(R)	Izingasilinganiso Lentela (R)
R0 kuya kuma-R237 100	18% engenisomali ekhokhelwa intela
R237 101 kuya kuma-R370 500	R42 678 + ama-26% engenisomali ekhokhelwa intela engaphezu kwama-R237 100
R370 501 kuya kuma-R512 800	R77 362 + ama-31% engenisomali ekhokhelwa intela engaphezu kwama-R370 500
R512 801 kuya kuma-R673 000	R121 475 + ama-36% engenisomali ekhokhelwa intela engaphezu kwama-R512 800
R673 001 kuya kuma-R857 900	R179 147 + ama-39% engenisomali ekhokhelwa intela engaphezu kwama-R673 000
R857 901 kuya kuma-R1 817 000	R251 258 + ama-41% engenisomali ekhokhelwa intela engaphezu kwama-R857 900
R1 817 001 nangaphezulu	R644 489 + ama-45% engenisomali ekhokhelwa intela engaphezu kwama-R1 817 000

Umthombo: Umgcinimafa Kazwelonke

INTELA YOKUDLULISWA KWEMPAHLA

Ithebula lamazinganani entela yokudluliswa kwempahla lizoguquka kusukela mhla lu-1 kuNdasa 2025. Isamba sokuqala esingama-R1 210 000 senani lempahla etholiwe asikhokhelwa intela yokudluliswa kwempahla. Ithebula lezilinganiso ezintsha lime kanje:


Intengo Yesakhiwo	Izingasilinganiso Lentela
R0 kuya kuma-R1 210 000	0% wentengo yesakhiwo
R1 210 001 kuya kuma-R1 663 800	3% wentengo yesakhiwo engaphezu kwama-R1 210 000
R1 663 801 kuya kuma-R2 329 300	R13 614 + 6% wentengo yesakhiwo engaphezu kwama-R1 663 800
R2 329 301 kuya kuma-R2 994 800	R53 544 + 8% wentengo yesakhiwo engaphezu kwama-R2 329 300
R2 994 801 kuya kuma-R13 310 000	R106 784 + 11% wentengo yesakhiwo engaphezu kwama-R2 994 800
R13 310 001 nangaphezulu	R1 241 456 + 13% wentengo yesakhiwo engaphezu kwama-R13 310 000

Umthombo: Umgcinimafa Kazwelonke

INTELISO JIKELELE YEZIBASELI

Inteliso jikelele kaphethiloli izokhuphuka ngama-16c iyofinyelela kuma-R4.01 ngelitha ngalinye bese kuthi ekadizili ikhuphuke ngama-15c iyofinyelela kuma-R3.85 ngelitha ngalinye mhlaka 4 kuNhlanguvana 2025.

Scan this QR code for the PDF version of this People's Guide to the Budget



UMBONO WAKHO UBALULEKILE

INGABE UWUTHOLE UWUSIZO LO MHLAHLANDLELA WABANTU NGESABELOMALI?

Silokhu sifuna ukuthola izindlela ezintsha zokuthuthukisa lo mhlahlandlela futhi singajabula uma ungasithumelela imicabango nemibono yakho ngalokhu ku-Media@treasury.gov.za